

بِسْمِ اللَّهِ الرَّحْمَنِ الرَّحِيمِ

Khutba Jummah

HAZRAT MUHYI-UD-DIN AL-KHALIFATULLAH

Munir Ahmad Azim

29 Janvier 2016 ~
(18 Rabi'ul Aakhir 1437 Hijri)

(Résumé Khutba)

Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lors « L'arrivée de Bane Prophètes pour Sauve L'Oummah de Hazrat Muhammad (saws) »:

L'ARRIVÉE DE BANE PROPHÈTES POUR SAUVE L'OUMMAH DE HAZRAT MUHAMMAD (SAWS)

Raison principale en faveur de la venue de bane nouvo prophètes ki pas porteurs de loi dans l'Oummah Mouhammadiyya (saws) c'est ki l'Islam fine vini pour le monde en entier et li bizin propagé partout. Et pour sa travail important là, deux arrangements vine bien nécessaires. Ene c'est la réforme intérieure de bane musulmans (c'est-à-dire, raffermissement de zot la foi dans l'Islam), et deuxième c'est la propagation de l'Islam dans le monde entier. Sa deux nécessités là pas pou capave réaliser sans ene discipline stricte, sans ene chef, ene Imam. Dans Quran Shareef Allah (swt) cause de sa discipline là dans sa façon là :

« C'est pas possible ki Allah quitte bane croyants dans situation kot ou été maintenant. So l'intention, c'est pou sépare bane mauvais et bane bons. Allah pas pou montrer ou So secrets, mais Allah choisir pou sa So bane messagers ki Li oulé. Alor croire dans Allah et So bane messagers. Et si ou ena la foi et suive bon chemin, ou pou gagne ene grand récompense. » (Al-Imran 3: 180).

Ici Allah pé dire à bane croyants : Zot pé prétañne ki zot ena la foi, mais tanque ki pas pou ena ene distinction entre saki bon et mauvais zot tous pou reste pêle-mêle avec le résultat ki l'Islam pou affaibli. Allah pas content ene tel état de choses. Li pou sûrement envoie ene

prophète pour sépare mauvais de saki bon. Puisse-ki Allah tousél conné ki sanlà ki bon et ki sanlà pas bon, et kot Li tousél conné couma pou sépare zot, alors Allah choisir ene musulman ki pieux pou capave faire sa travail là, pou distingue le bon de saki mauvais. Ô bane croyants !

« **Alor croire dans Allah et So bane messagers.** »

Alor, si arriver aucaine prophète pas bizin vini, alor kifer Allah (swt) dire à bane ki croire dans Hazrat Mohammad (saws) ki ene l'époque pou vini kot pas pou ena aucaine différence entre bon et mauvais et ki alors Li pou envoye ene prophète ? Kifer eski Li (Allah) fine donne l'ordre pou croire en sa prophete là, pou ena la crainte (c'est-à-dire, kot sakaine bizin fer sa zéffort pou réformer là) ? Ena dans tout sa, matière à réflexion.

Réfléchi : Dans sa siècle là, ena actuellement des millions et des millions de bane musulmans lor la terre. Zot ena bane gouvernements, bane richesses et bane *ulémas*, mais malgré tout sa, nannié pas faire concrètement pour répanne et améliore l'image de l'Islam face à bane calomnies de bane les autres nations et pensées lor saki l'Islam vraiment été, lor saki li (l'Islam) vraiment représenter. Au contraire, l'Islam pé affaibli de jour en jour, bane vrais l'enseignements de l'Islam pé piétiné ; la façon de pratique l'Islam donne ene mauvais l'image à l'Islam kot même l'Islam li accusé d'être ene religion ki encourage le terrorisme. Sa bane même dimounes ki dire ki zot « musulmans » fine salir beaucoup bane commandements de l'Islam et zot fine donne ene mauvais l'image de sa religion parfait là à bane les autres religions à travers le monde en entier.

Donc li évident ki pour la propagation de l'Islam pas ena tant besoin de gouvernement, de richesse et de nombre ki de piété et de la foi ; par contre, Jamaat Ul Sahih Al Islam fine prend sa responsabilité bien lourd là. Malgré grand l'opposition ki nous ena lors le dos, le Jamaat Ul Sahih Al Islam persévérer et propage le message de l'Islam dans le monde entier. Par rapport à richesse matériel, Jamaat Ul Sahih Al Islam li azordi pauvre, et aussi très peu nombreux, mais bane ki oppose li (Jamaat Ul Sahih Al Islam) pas pou capave contrecarré le travail ki li pé accompli de par le monde. Kifer sa ? Simplement parski sa Jamaat Ul Sahih Al Islam ena ene *Khalifatullah*, ene Imam élu d'Allah dans sa siècle là.

Bane membres du Jamaat Ul Sahih Al Islam ena la foi et la piété ki rempli zot lé cœur. Zot essaye marche d'après bane l'enseignements de Quran Shareef. Zot faire bane sacrifices l'argent et la vie pour la mission islamique. Tous zot bane z'efforts canalizé sous bane directives d'ene chef élevé par Allah pour zot et pour le reste du monde. Zot travaille avec ene discipline sévère. Zot ena la ferme conviction ki nous Jamaat li celui ki ena la charge pou prend responsabilité de la relève de la mission du Saint Prophète (saws) et Allah fine en vérité béni tous sa bane dimounes ki fine reconnaite le Khalifatullah de sa siècle là. *Insha Allah* sa bane dimounes chanceux là (bane disciples du Khalifatullah) pou travaille encore plus dur et bane

les autres pou vini ki pou guidé par Allah vers sa la vérité là pour répandre bane messages de l'islam entier le monde et ki grâce à sa bénédiction divine là, kot zot fine accepté ene Khalifatullah, *Insha Allah* bane musulmans pou vine encore ene fois bane adorateurs de l'unité (de l'unicité d'Allah), et sans crainte et empêchement, zot pou adore le seul et unique Dieu. D'après la promesse divine, le Khalifatullah pou réussi *Insha Allah* amène le monde entier à l'islam. Allah (swt) cause à propos du Khalifatullah (Calife d'Allah) dans sa façon là :

« Allah fine promesse bane parmi ou ki ena la foi et ki faire le bien ki Li pou place zot lor la terre comme So bane gérants, couma Li ti faire avec bane ki ti vine avant zot ; et ki Li va renforcé zot religion ki Li fine content donne zot, et ki Li va transforme zot crainte en sécurité. 'Zot adore Moi et pas associer nannié avec Moi.' Bane ki refuse gagne la foi après sa, zot vraiment suivre chemin travers. » (An-Noor 24: 56).

Ô mo bane frères et sœurs musulmans ! Prié et reste lor zot garde. L'islam fine vine faible azordi. Zot et zot bane zenfants, zot fine éloigne zot de l'islam. Sa la foi et sa croyance ferme ki ti lontan trouve dans les cœurs de bane compagnons du Saint Prophète Muhammad (saws), kot li été astaire ? Nous bizin sa même la foi et sa même l'union là ; en bref, c'est à travers ene Calife d'Allah ki l'islam pou propager bien vite lor la terre encore ene fois. Azordi bane musulmans zot faibles, tempête de l'infidélité et de l'apostazie menace pou balyé zot. Si Allah pas tenir So promesse azordi, bé kan alor Li pou faire li ?

Allah tenir toujours So bane promesses, et dans sa siècle là, kan Li fine élève ene Muhyiuddin, Khalifatullah, Li fine accompli sa promesse là pour zot. Donc, kifer eski zot prend ene l'attitude hostile envers le Khalifatullah de sa siècle là ? Laisse sa kalité l'attitude là pou bane *uléma* avec zot bane *bidat* (innovations) ki zot faire, kot zot fine ferme la porte de la venue de bane prophètes et la porte de la révélation divine, pour ouvert bane la portes de bane innovations (bane *bidat* tels ki: *Khatam*, *Taweez*, *Chalissema*, *Mawlood*) et zot fine fer bane dimounes délaisse le Quran Shareef, et faire zot attirer vers zot (sa bane *uléma* là). Bane *uléma* corrompu ena donc la haine pour ene messenger d'Allah. Mais zot (Ô mo bane frères et sœurs), zot bizin ouvert zot lizié. Eski le Saint Prophète (saws) pas fine dire : « *Zot bane uléma pou bane pires créatures sous le toit du ciel* » ? Abandonne sa bane là (sa bane *uléma* là) à zot sort. Vine associer zot à nous pour faire la propagation de l'islam, et faire réussir mission de nous bien-aimé prophète (saws) lor la terre.

Ô mo bane frères et sœurs ! *Nabouwwat* (l'apostola) pou touzour contigné ena, mais seulement ene *Nabouwwat* (apostola, prophethood) ki attaché avec le Saint Prophète (saws) dans la beauté de so perfection et de so sceau. Et en vérité, la venue de bane tels prophètes, suivants fidèles du Saint Prophète Muhammad (saws) pou faire zot apparition en zot lé temps désigné par Allah jusqu'au jour du jugement dernier. Personne pas pou capave arrête sa. C'est

ene bénédiction d'Allah et c'est Allah ki fine faire sa promesse là. Et Li (Allah) tenir toujours So bane promesses. Allah touzour ré-consolide et reforme So bane religions. Pour sa, Allah envoie ene prophète ou ene réformateur pour retire l'homme du matérialisme et pou ramène li vers so Créateur. Ene tel réformateur demande beaucoup de sacrifices (depuis bane dimounes) au nom d'Allah. Li invite bane dimounes pou travaille et donne des peines, pou persévérer et reste patient, et li (sa prophète-réformateur là) annonce zot ki bane ki oulé vivre, alor zot bizin prêt pou donne zot la vie. Li (sa messenger là) prépare zot pour ene longue la lutte ki bien pénible contre ene l'opposition et ene persécution aveugle de la part de bane ki zot content (kot zot ena l'amour pour sa bane dimounes ki pé oppose zot là) et zot rode sauve sa bane dimounes là.

En effet, c'est sa vrai et éternelle philosophie pou faire revivre bane vrai l'enseignements divines. N'importe ki philosophie ki alle à l'encontre de sa li selman ene fausse conception de l'esprit de l'homme, li selman ene fantézi. Mo bizin attire zot l'attention ki sak musulman, de n'importe ki secte/ Jamaat ki li appartenir, croire dans l'unicité d'Allah, et dans l'apostola du Saint Prophète Muhammad (saws). Sak musulman croire ki l'Islam li dernier la religion pour le salut de l'humanité. Tous bane musulmans croire ki l'Islam pou continuer exister ziska le jour du jugement pour satisfaire bane besoins spirituels de l'homme.

Tous bane musulmans croire ki la loi révéle à travers le Saint Prophète (saws), li ene telle la loi ki zamais pou capave changer et ki aucaine corruption et changement pas capave touche le Quran même ziska dans so bane tipti parties. Bane musulmans de tous bane l'écoles (de pensées) croire ki bane dres (et pratiques) du Saint Prophète Mouhammad (saws) zot ena autant valeur et l'autorité aujourd'hui pareil couma zot ti ena valeur dans le passé, et zot pou contigner ena valeur pour tous les temps jusqu'au dernier de bane dimounes (lor la terre). Bane musulmans de toutes bane sectes croire ki c'est seulement par ene alliance avec le Saint Prophète Muhammad (saws) ki nous capave percevoir et trouve la lumière de la vérité éternelle. Sa bane points fondamentales là zot accepté par tous bane musulmans sans aucaine exception. Avec autant de points en commun, mais selman ena sa différence fondamentale ki distingue le Jamaat Ul Sahih Al Islam de bane les autres musulmans kot sa bane là fine ferme la porte de l'apostola, de « *prophethood* », et celui de la Révélation Divine.

Vini, Ô bane créatures d'Allah ki bons, ki justes et honnêtes. Vine donne ene coup de main pour atteindre sa joli but là. Vine bane héritiers de bane faveurs et bénédictions divines. Ki Allah donne zot sa bonheur là ! *Ameen*.